



## Kuwepo Kabla-kwa-Mwana wa Mungu,

**N**a sasa, Baba, unitukuze mimi pamoja nawe, kwa utukufu ule niliokuwa nao pamoja nawe kabla ya ulimwengu kuwako.—**Yohana 17:5.**

Wakati ambapo Neno la Mungu linanena juu ya ubinadamu wa Kristo akiwa hapa duniani, Neno hilo pia linanena kwa uwazi kabisa juu ya hali ya kuwepo Kwake kabla. Neno Alikuwapo kabla kama nafsi ya Mungu, kama Mwana wa Mungu wa milele, katika umoja na hali ya kuwa mmoja na Baba Yake. Tangu milele Yeye alikuwa Mpatanishi wa lile agano ambalo katika hilo mataifa yote ya Dunia, Wayahudi na Wamataifa kwa pamoja, kama wakimkubali Yeye, wangebarikiwa. “Naye Neno alikuwako kwa Mungu, naye Neno alikuwa Mungu” (Yohana 1:1). Kabla wanadamu au malaika hawajaumbwa, Neno alikuwa na Mungu, Naye alikuwa Mungu.

Dunia iliumbwa na Yeye, “wala pasipo Yeye hakikufanyika cho chote kilichofanyika” (aya ya 3). Kama Kristo alifanya vitu vyote, basi Yeye alikuwapo kabla ya vitu vyote. Maneno yaliyonenwa kuhusu hili yalikuwa thabiti kiasi ambacho hakuna aliyepaswa kuachwa katika mashaka. Kimsingi, Kristo alikuwa Mungu, tena kwa maana halisi kabisa. Yeye alikuwa pamoja na Mungu tangu milele, Mungu juu ya yote, mbarikiwa wa milele.

Bwana Yesu Kristo, Mwana wa Mungu wa mbinguni, alikuwapo tangu milele, nafsi bayana na licha ya hivyo akiwa mmoja pamoja na Baba. Alikuwa utukufu usiopimika wa mbinguni. Alikuwa amiri jeshi wa viumbe wa kimbingu na alipokea heshima kubwa ya malaika ikiwa ni stahili Yake. Hii haikuwa ya kumnyang’anya Mungu. “BWANA alikuwa nami katika mwanzo wa njia yake,” anasema, “kabla ya matendo Yake ya kale. Nalitukuka tokea milele, tangu awali kabla haijawako Dunia. Wakati visipokuwapo vilindi nalizaliwa, wakati zisipokuwako chemchemi zilizojaa maji. Kabla milima haijawekwa imara, kabla ya vilima nalizaliwa. Alipokuwa hajaiumba Dunia, wala makonde wala chanzo cha mavumbi ya dunia; alipozithibitisha mbingu nalikuwako; alipopiga duara katika uso wa bahari” (Mithali 8:22-27).

Kuna nuru na utukufu katika ukweli kwamba Kristo alikuwa mmoja na Baba kabla ya msingi wa dunia kuwekwa. Hii ni nuru inayong’aa mahali penye giza, ikifanya ipendeze kwa utukufu wa awali wa Mungu. Ukweli huu, ambao ni fumbo lisilo na kikomo kwa wenyewe, unaelezea kweli zingine zisizoelezeka, hali ukiwa umezingwa na nuru, isiyofaa kuikaribia na isiyoelezeka...

“Watu wale waliokaa katika giza wameona mwanga mkuu; nao waliokaa katika nchi na uvuli wa mauti mwanga umewazukia” (Mathayo 4:16). Hapa kuwepo kwa Kristo kabla ya kuja duniani, na kusudi la udhihirisho Wake kwa ulimwengu wetu vinawasilishwa kama miale hai ya nuru kutoka kwenye kiti cha enzi cha milele (Selected Messages 1:247, 248).

(Kristo) anasema, hebu utukufu wangu ung’ae – utukufu niliokuwa pamoja Nao kabla dunia haijakuwepo (The Signs of the Times, Mei 10, 1899).